

BINGANA YA YESU LONGAKA

Baleso ya Bible sambu na Bana
Muntu ya me sonika baleso yai, Mama Lorella Rouster ya MCE

Dititi yai kele kaka sambu na nge, longi! Tanga yo na bana ve.

Mbote na nge, longi! Beto na MCE kele na kiese mingi na kupesa nge mbote na zina ya Mfumu na beto Yesu Kristo. Mbote nge tanga dititi yai na ntuala nge yantika kulonguka lesu ya ntete, sambu dititi yai ta songa nge inki mutindu na kusadila mukanda yai, ti inki mutindu na kulonguka baleso sambu na kulonga yo na bana.

INKI MUTINDU NGE LENDA SADILA MUKANDA YAI?

Mukanda yai ikele kaka guide sambu na kusadisa nge, longi, kulonguka baleso yai, mpi na kuyidika baleso yai sambu na kulonga yo na bana. Kana nge zola na kumona malongi ya baleso yai, nge fweti tanga baverse ya Bible. Beto me tula baverse yina na kati ya mukanda yai na italics. *Yo ta monika bonso bisono yai.* Yai kele kusadisa beno kana beno kele na Bible ya Kituba ntete ve. Na ntuala ntangu ya nge fweti longa bana, mbote nge tanga mbote-mbote lesu ya nge ta longa, ti baverse ya Bible ya lesu yina. Ebuna ntangu nge telema na ntuala ya bana kulonga, nge ta zaba lesu ya Bible mbote. Nge ta vanda na mpila ya kutubila bana malongi ya bingana yai. Nge ta balula ve malongi sambu nge ta zaba yo mbote.

Beto me songa kikuma sambu na konso lesu. Kikuma ikele dilongi ya nene nge zola bana kusimba mbote na kati ya lesu. Mbote nge yindula mingi kikuma ya konso lesu, sambu nge ta sosa na bampila yonso na kutendula yo. Na mambu yonso ya nge ta sala, nge ta sosa mpila na kutendula dilongi yina sambu bana bakisa yo mbote.

Na nima ya kuzaba lesu mbote-mbote, nge ta longa yo mutindu yai:

1. ***Kabisa lesu*** na bandambu ya nkufi, verse mosi to zole na konso ndambu.
2. Na konso ndambu, beto sala mambu yai ti bana:
 - A. **Kutanga verse** to, kana yo kele nda, kulonga mabanza na yo.
 - B. **Kuvula baquestio** sambu bana yindula mbote-mbote mambu ya bo me wa.
 - C. **Kusala mwa-théâtre** ya kusonga mambu ya lutak--na lesu ya mvimba ve, kansi kaka na ndambu ya baverse ya beto me tanga.
 - D. **Kuyimba** mambu ya beto me mona na mwa-kitini ya nkunga. Nge mosi ke tula ton ya nkunga yina. Yo fweti vanda ve nkunga ya bana ke zaba, sambu yo kele kaka kitini ya nkufi to phrase mosi. Yimba yo mbala ndambu mingi tii ntangu ya bana me simba yo mbote. Tula bageste ti movement bonso kukina ti yo, sambu bana vanda na kiese kuyimba yo.
3. Na nsuka ya kulonga lesu, tuba diaka **mabanza ya nene** ya lesu yina.
4. Songa devoir sambu na bakristo. Yo ta vanda mfunu, na mposo na nima, kulomba rapport sambu na devoir yina. Kaka yula bana nani me meka kusala yo ti pesa bo felisatio.

www.teachingforafrica.com

Par l'ONG "Ministères pour Chaque Enfant"

5. Longa **verse ya lesu**. Bana ta longuka yo nswalu kana nge longi tula yo na nkunga.
6. Na ntwala bana basika, sala **invitation** na kubinga na Yesu bana ya me yamba Yandi ntete ve na luzingu na bo. Nge lenda sala invitation na bandinga bonso yai:
"Yesu zola gulusa nge bubu. Kana nge me yamba Yandi ntete ve bonso Ngulusi ti Mfumu na nge, kansi bubuyai nge zola yamba Yandi, ntangu bana ya nkaka basika, nge bikala awa (songa na inki kiti). Mono ta kwisa sadisa nge na kuzaba Yesu Kristo."
7. Na nima ya ecodim, nge fweti sadisa bana ya me ndima invitation, me kwenda kuvanda na sika ya nge me songa. Sadila bacarte ya kutwadisa, to tendula bo verse bonso Yoane 1:12. **Twadisa bo na bisambu sambu na kuvamba Yesu**, ye baka bazina na bo. Kana dibundu na nge kele na classe ya balandi, yai kele ntangu ya mbote ya bo lenda kota na yo.

NB: Beto me sonika guide yai na mpila nde yo songa nge, longi, inki kusala. Yo yina, yo ta vanda mbote ve nde nge kaka tanga yo na bana. Nge tanga inki kusala, ebuna nge sala na mpila yo me songa nge kusala. Partie nge ta tanga kele baverse ya Bible, sika yo ke tuba nde, « Kutanga : ». Nge mpi lenda lomba mwana ya ke tanga mbote kutanga baverse yai.

Beto na MCE zodila nge, Malongi ya mbote !

BINGANA IKELE INKI?

Longi, mbote na luyantiku ya baleso yai kana nge tendula bana bingana kele inki, ti bambukisa bo mbala na mbala na bamposo ke kwisa ya nge kele kulonga baleso yai.

Bantu yonso zola bahistoire. Bambuta ya Congo vandaka ngolo na kulonga na bahistoire. Yesu mpi vandaka kulonga mutindu yina.

Bingana kele bahistoire ya ke longa mambu ya kieleka. Bingana ya Bible ke longa mambu ya Nzambi. Yo kele kutuba mambu ya ntoto yai, mambu ya bantu zaba ti bakisa nswalu. Kansi malongi na yo kele malongi ya kimpeve. Bingana ya Bible kele bahistoire ya ke tadila luzingu yai, kansi ke longa mambu ya kimpeve.

LESO 1 NTOTO YA MBOTE

BAVERSE YA LESO: *Matayo 13:1-9, 18-23*

KIKUMA YA LESO: Beto zaba nde Nzambi ke sosa ntima ya ke yamba ndinga na Yandi, ebuna beto yidika ntima sambu na kuyamba ti kulemvuka na ndinga ya Nzambi (na Bible).

VERSE YA KULONGUKA: *Matayo 22:37-38* (Ntima ya ke zola Nzambi ikele ntoto ya mbote.)
37 Yesu tubaka nde: “Nge fweti zola Mfumu Nzambi na nge, na ntima na nge yonso, ti na mabanza na nge yonso.”

38 Yina kele nsiku me luta mfunu, yo kele mpi nsiku ya ntete.”

BIMA KUYIDIKA NA NTWALA YA LESO: Sosa ndambu ya bankeni ti yidika yo sambu na kunata yo na classe.

KUYANTIKA LESO: Songa bankeni. Losa yo na bisika na bisika. Yula bana kana KONSO nkeni ya bantu ke kunaka ke yelaka mbote. (Ikele ve.) Yesu tubaka kingana ya ke songa mpila bankeni ya nkaka ke yelaka kansi ya nkaka ke yelaka ve.

KULONGA LESO:

1. Yesu kotaka na bwatu. Yandi vandaka kulonga bantu mingi.

Tanga: *Matayo 13:1-3*

1 Kilumbu yina, Yesu katukaka na nzo, yandi kwendaka kuvanda kuvanda penepene na dizanga sambu na kulonga.

2 Bantu mingi kwisaka kifuluka penepene na Yesu, yo yina yandi kwendaka kuvanda na kati ya bwatu. Bantu yonso kwisaka kutelema penepene na masa.

3 Yandi vandaka kutubila bo mambu mingi na bingana nde: “Muntu mosi katukaka na nzo na yandi sambu na kwenda kukuna bilanga.

Yula bana:

- Sambu na inki Yesu kotaka na bwatu?
- Yandi salaka inki na kati ya bwatu?
- Bantu ya waka Yesu vandaka wapi?
- Yesu longaka bo inki mutindu?

Sala théâtre: Yesu ke longaka na bwatu.

Yimba: Yesu kotaka na bwatu—ti kuna yandi longaka!

2. Kingana: Muntu kunaka nkeni, kansi yonso yelaka ve.

Tanga: *Matayo 13:4-7*

4 Ntangu yandi vandaka kukuna bambuma na bilanga, bambuma ya nkaka kwenda kubwa na kati ya nzila; bandeke kwisa kudia yo.

5 Bambuma ya nkaka kwenda kubwa na ntoto ya matadi; ntoto yina vandaka mingi ve.

Bambuma yango menaka nswalu, sambu ntoto vandaka mingi ve.

6 Kansi ntangu pesaka mwini ya ngolo, yo zikisaka bamwa-nti yina yelaka, yo kangisaka

bimenina yina ya mbote.

7 Bambuma ya nkaka kwenda kubwa na kati ya bamwa-nti yina yelaka, yo kangisaka bimenina yina ya mbote.

Yula bana:

- Sambu na inki nkeni menaka ve kana yo kubwaka na nzila?
- Sambu na inki yo yelaka ve mbote kana yo kubwaka na zulu ya matadi?
- Sambu na inki yo yelaka ve mbote kana yo kubwaka na kati ya bansende?

Sala théâtre: Losa bankeni. Yo kele kubwa na bisika mutindu na mutindu.

Yimba: Muntu kwendaka na kukuna bankeni.

Yandi kunaka yo na bisika mingi.

Na kati ya bankeni yina, ya nkaka yelaka ve mbote.

3. Bankeni ya nkaka yelaka mbote sambu bo bwaka na ntoto ya mbote.

Tanga: *Matayo 13:8-9*

8 Kansi bambuma ya nkaka kwenda kubwa na ntoto ya mbote. Bimenina na yo butaka bambuma: yankaka butaka bambuma nkama, yankaka makumi sambanu, yankaka makumi tatu.

9 Ebuna Yesu nde: "Konso muntu yina ke na makutu, yandi wa!"

Yula bana:

- Sambu na inki bankeni ya nkaka yelaka mbote?
- Bankeni ya yelaka mbote kubwaka wapi?
- Yo butaka inki mutindu?

Sala théâtre: Losa bankeni, songa na geste bonso yo kele kuyela mingi.

Yimba: Bankeni ya nkaka yelaka na ntoto ya mbote,

'buna yo butaka mingi!

4. Yesu tendulaka kingana yina. Yandi tendulaka bankeni ya bwaka na nzila.

Tanga: *Matayo 13:18-19*

18 "Beno wa disongidila ya kingana ya muntu yina kwendaka kukuna bilanga.

19 Bantu yina ke waka Nsangu ya Kimfumu ya Nzambi kansi bo ke bakisaka yo ve, bo kele bonso nzila. Bambuma ya nkaka ke kwisaka kubwa na nzila yina. Muntu ya Mbi ke kwisaka kukatula mambu yina kele na ntima na bo.

Yula bana:

- Nkeni ya kubwaka na nzila kele kusonga inki?
- Nani kele nswalu na kukatula mabanza ya nsangu ya mbote sambu yo kota ve na ntima ya muntu?

Sala théâtre: Ndambu ya bana losa bankeni. Bana ya nkaka kwisa nswalu na nima na kulokuta yo.

Yimba: Satana zola yiba malongi beto me wa, sambu beto yindula yo diaka ve.

5. Yesu tendulaka bankeni ya bwaka na zulu ya matadi.

Tanga: *Matayo 13:20-21*

20 Bantu ya nkaka mpi kele bonso ntoto yina kele na zulu ya matadi. Nsangu ke kwisaka kubwa na ntoto yina. Kana bo wa yo imene, bo ke ndimaka yo na kiese.

21 Kansi bo ke kangaka ntima ve. Bo ke vandaka na yo ntangu mingi ve. Ebuna kana bo kumona mpasi to bantu ya nkaka kumonisa bo mpasi sambu na nsangu ya Nzambi, bo ke katulaka lukwikilu na bo nswalu.

Yula bana:

- Nkeni ya kubwaka na matadi kele kusonga inki?
- Keti nge me mona lukwikilu ya bakristo kubwa na ntangu ya mpasi? Ntima na bo kele bonso inki?
- Keti bo ta buta bambuma ya mbote?

Sala théâtre: Mwana mosi tuba nde yandi me yamba Yesu. Mwana ya nkaka seka yandi, ebuna mwana ya ntete mona nsoni, yandi yantika kubuya Yesu.

Yimba: Kuvutuka, yo lunga ve na bakristo!
Ntima na bo ikele ve bonso matadi.

6. Yesu tendulaka bankeni ya bwaka na bansende.

Tanga: *Matayo 13:22*

22 Bantu ya nkaka mpi kele bonso kisika yina ke na bamwa-nti ya nsende. Nsangu ke kwisaka kubwa na kisika yina. Bo ke waka nsangu yango, kansi mabanza sambu na luzingu yai ya nsi-ntoto ke yangisaka bo, kiese ya kimvwama ke kusaka bo, bo ke kangisaka nsangu; yo yina nsangu ke fwaka ka yo mpamba.

Yula bana:

- Nkeni ya kubwaka na bansende ke songa inki?
- Inki mambu lenda kanga beto nzila nde beto yamba ve ndinga ya Nzambi mbote-mbote?

Sala théâtre: Mwana mosi ke wa ndinga ya Nzambi, kansi yandi kele yindula na ntima na yandi inki mutindu yandi lenda kuzwa mbongo.

Yimba: Nzala ya mbongo ta yiba nge!
Nzala ya mbongo ikele bonso bansende.
Ndinga ya Nzambi ke kotaka ve mbote
Sika nzala ya bimvwama ikele!

7. Yesu tendulaka bankeni ya bwaka na ntoto ya mbote.

Tanga: *Matayo 13:23*

23 Bantu ya nkaka kele bonso ntoto ya mbote. Nsangu ke kwisaka kubwa na ntoto yina. Bo ke waka yo, bo ke bakisaka yo; bo ke butaka bambuma: bankaka nkama, bankaka makumi sambanu, bankaka makumi tatu.

www.teachingforafrica.com

Par l'ONG "Ministères pour Chaque Enfant"

Yula bana:

- Nkeni ya kubwaka na ntoto ya mbote ke songa inki?
- Kana beto me yamba ndinga ya Nzambi mbote, inki ta monika na luzingu na beto?
- Keti bakristo yonso ta buta bambuma kiteso mosi?

Sala théâtre: Mwana mosi vandaka muyibi ya ngolo. Yandi yantika kuwa ndinga ya Nzambi. Yo bula yandi na ntima. Na nima, yandi vutula bima ya yandi me yibaka.

Mwana ya zole vandaka na munoko ya kufinga. Yandi ke wa ndinga ya Nzambi ti yo bula ntima na yandi. Yandi kwenda kulomba bampangi kana bo lenda lolula yandi.

Mwana ya tatu vandaka kusala kindoki. Yandi ke wa ndinga ya Nzambi ti bo bula yandi na ntima. Yandi baka bansinga ti bafetish ti bima yonso na yandi ya kindoki, yandi yoka yo tiya.

Yimba: Bantu ya nkaka kuwa

Ndinga ya Nzambi.

Ebuna bo lemfuka.

Bo ntoto ya mbote.

MALONGI YA NENE YA LESO YAI: Ntangu beto kuwa ndinga ya Nzambi, mbote beto yamba yo na ntima na beto yonso. Ebuna beto ta vanda ntoto ya mbote ti beto ta buta bambuma mingi ya kimpeve ya ta pesa Nzambi kiese.

MALONGI YA BAKRISTO: Mukristo, inki mutindu nge ke yambaka ndinga ya Nzambi? Keti nge me yidika ntima na nge na kuyamba yo mpi na kulemvuka na yo? Nge lenda samba Nzambi sesepiyai sambu na kuyidika ntima na nge? Mono ke pesa beno devoir yai: Mposo yai, tula ngolo na kutanga to na kuwa ndinga ya Nzambi konso lumbu. Ebuna yindula ti tula ngolo kulemfuka na yonso ya nge ke wa.

KUBINGA BANA NA YESU: *(Longi, landa mbandu kele na luyantiku ya mukanda yai. Tala page 2, No. 6, Invitation)*

BANKUNGA YA KWENDA NZILA MOSI TI LESO:

O KEBA NTIMA INKI NGE ZOLA!

KUWA BIBLE

LESO 2 MUNTU YA LUZOLO

BAVERSE YA LESO : *Luka 7: 36-47*

KIKUMA YA LESO: Kuzaba nde, kana nge me tula ntima na Yesu, Nzambi me lolula masumu na yandi yonso, ebuna mbote nge mukristo songa luzolo mingi na Nzambi.

VERSE YA KULONGUKA: Matayo 22:37 diaka

KUYIDIKA YA NTWALA YA LESO : Sosa mulangi ya parfum ya nsudi ya kitoko ya nge lenda songa na classe.

KUYANTIKA LESO: Kusonga mulangi ya parfum to fleur ya nsudi ya mbote. Bana kuwa nsudi na yo. Yula bo kana bo ta losa parfum yina na makulu.

KULONGA LESO:

1. Nkento ya vandaka muntu ya masumu songaka luzolo ya nene sambu na Yesu.

Tanga: *Luka 7: 36-38*

36 Mufarize mosi bingaka Yesu na kwisa kudia na nzo na yandi. Yesu kwisaka kuna, ebuna Yandi vandaka na mesa sambu na kudia.

37 Na bwala yina kuvandaka na nkento mosi vandaka kusala kindumba. Ntangu yandi waka nde Yesu ke dia na nzo ya Mufarize yina, yandi nataka mulangi mosi ya bo salaka na ditadi ya albatre; mulangi yina vandaka ya kifuluka na mananasi.

38 Yandi kwisaka kutelama na nima ya Yesu, na makulu. Yandi vandaka kudila, mansanga na yandi yantikaka kubwa na zulu ya makulu ya Yesu. Ebuna yandi dipaka makulu ya Yesu na nsuki na yandi, yandi pesaka yo beze, yandi tulaka yo mananasi.

Yula:

- Yesu vandaka kudia wapi?
- Nkento ya kwisaka na Yesu-- yandi vandaka nkento ya mbote to ya mbi?
- Yandi salaka inki?
- Inki basikaka na meso na yandi?

Sala théâtre: Mwana mosi sala bonso Yesu, bana ya nkaka vanda balonguki.

Bo ke dia na nzo ya Farize mosi. Nkento kwisa, yandi losa parfum na makulu ya Yesu, yandi dila ngolo.

Yimba: Nkento dilaka masumu na yandi,
Yandi nataka mpi parfum ya nsudi ya mbote.

2. Simon vandaka kubokuta sambu na mambu yina.

Tanga: *Luka 7: 39-40*

39 Mufarize yina bingaka Yesu, ntangu yandi monaka mambu yina, yandi yantikaka kutuba yandi mosi na ntima nde: 'Kana ya kieleka muntu yai vandaka profete, yandi zolaka kuzaba kana nkento yai ke simba yandi kele nani, mpi nde nkento yai kele nki mutindu; yandi zolaka kuzaba nde yandi ke salaka kindumba!'

www.teachingforafrica.com

Par l'ONG "Ministères pour Chaque Enfant"

40 Ntangu yai, Yesu tubilaka Mfarize yina nde: “Simoni, mono ke na mambu ya kutubila nge.”
Simoni nde: “Longi, tuba.”

Yula:

- Inki vandaka mabanza ya Simoni?
- Inki mutindu Yesu zabaka mabanza na yandi?

Sala théâtre: Mwana mosi songa luse ya makasi, songa mabanza ya mbi bonso Simoni.

Yimba: Yesu zabaka mabanza ya mbi ya Simoni!

3. Yesu songaka yandi kingana na kusonga nani ke zola muntu mingi.

Tanga: Luka 7:41-42

41 Yesu nde: “Kuvandaka na bantu zole, bo vandaka na mfuka ya muntu mosi yina ke defisaka bantu mbongo. Muntu ya ntete defaka bibende nkama tanu, yazole defaka bibende makumi tanu.

42 Bo vandaka na mbongo ve ya kufuta mfuka yina. Yo yina, muntu yina defisaka bo mbongo yandi katulaka yo bonso zole mfuka yina. Na kati ya bantu yai zole, nani ta luta kuzola yandi?”

Yula:

- Bantu tatu kele na kati ya kingana yai. Bo kele banani?
- Inki diswaswanu na kati na bo?
- Inki questio Yesu yulaka?

Sala théâtre: Kusonga mfumu ke lolula bantu zole ya mfuka na bo. Bo ke kwenda na kiese.

Yimba:

- Yesu yulaka yandi, ‘Nani muntu ya ta zola mingi?’

4. Muntu ya ta zola mingi kele yina ya mfumu me lolula mfuka ya nene.

Tanga: Luka 7:43

43 Simoni nde : « Mono banza nde muntu ta zola yandi mingi kele muntu yina defaka mbongo mingi. » Yesu nde : « Nge me tuba mbote. »

Yula:

- Inki mvutu Simoni pesaka na questio ya Yesu?
- Mvutu na yandi vandaka mbote?
- Sambu na inki nkento yina zolaka Yesu mingi?

Sala théâtre: Muntu mosi sala bonso Yesu, ya nkaka bonso Simoni.

Yimba: Muntu ke zolaka Yesu mingi, kele yina ya Yesu me lolula mingi.

5. Mpila nkento me sala songaka nde yandi zolaka Yesu mingi sambu na lutondo nde Nzambi me lolula masumu na yandi.

Tanga: *Luc 7:44-47*

44 Ntangu yai, yandi balukaka na ndambu ya nkento yina vandaka, ebuna yandi tubilaka Simoni nde : « Nge me mona nkento yai ? Mono me kota na nzo na nge, ebuna nge me pesa mono masa ve sambu na kusukula makulu na mono. Kansi nkento yai me yobisa makulu na mono na mansanga na yandi, ebuna yandi me dipa yo na nsuki na yandi.

45 Nge me pesa mono beze ve. Kansi yandi, katuka ntangu mono me kwisa kukota, yandi ke pesa kaka makulu na mono beze.

46 Nge me tula mono ve mafuta na ntu. Kansi nkento yai me tula mono mananasi na makulu.

47 Yo yina, mono ke tubila nge nde kuzola yina ya nene ya yandi me songa yo ke songa nde Nzambi me lolula yandi, ata yandi salaka masumu mingi. Kansi muntu yina salaka masumu mingi ve, kana Nzambi kulolula yandi, muntu yina ta songa kuzola mingi mpi ve. »

Yula bana:

- Na kati ya Simoni ti nkento yina, nani me sala Yesu mbote?
- Sambu na inki nkento me sala mpidina?

Kusala théâtre:

- Mwana mosi vanda Yesu. Na diboko mosi na yandi, mwana ya bakala sala bonso Simoni. Na diboko ya nkaka, mwana ya nkento sala bonso nkento ya nataka mananasi.
Yesu yula:
 - >Nani me yobisa makulu na mono?
Simoni nikisa ntu nde, « Mono ve. »
Nkento nde, « Mono, Mfumu, Mono. »
 - >Nani me pesa mono beze ?
Simoni nde, « Mono ve »
Nkento nde, « Mono, Mfumu, Mono. »
 - >Nani me pakula mono mafuta ?
Simoni nde, « Mono ve »
Nkento nde, « Mono, Mfumu, Mono. »
 - >Nani me zola mono mingi ?
Simoni nde, « Mono ve »
Nkento nde, « Mono, Mfumu, Mono. »
 - >Nani mono me lolula mingi ?
Simoni nde, « Mono ve »
Nkento nde, « Mono, Mfumu. Matondo, matondo.»

MALONGI YA NENE: Beto zola Yesu Kristo sambu masumu na beto vandaka nene, kansi Yandi lolulaka yo yonso.

MALONGI YA BAKRISTO: Solula inki mutindu bo lenda songa luzolo ya nene na bo sambu na Yesu. Ngindu mosi ikele kaka kusamba nde, "Yesu, mono zola nge." Na nima, sala théâtre ya ke songa bana ya ke sala mambu ya beno me solula.

www.teachingforafrica.com

Par l'ONG "Ministères pour Chaque Enfant"

KUBINGA BANA NA YESU: Landa mbandu na luyantiku ya mukanda.

BANKUNGA YA KWENDA NZILA MOSI TI LESO:

O KEBA NTIMA INKI NGE ZOLA

ZOLA YESU! NA KIESE! (Ton:Kumisa Nzambi! Na Kiese!)

MONO ZOLA NGE MINGI, O MFUMU!(Ton:Yesu Ikele Awa)

LESO 3 MATITI YA MBOTE TI YA MBI Matayo 13:24-30, 36-51

KIKUMA YA LESO: Beto mona mpasi ve kuzenga nani kele bakristo ya kieleka sambu Nzambi ke zaba bantu na Yandi.

VERSE YA KULONGUKA: 2 Timoteo 2:19a

Kansi fondasio ya ngolo yina ya Nzambi tulaka yo kele kaka ngolo, ebuna bo me sonikaka na zulu na yo nde: “Mfumumu Nzambi zaba bantu na yandi!”

KUYIDIKA NA NTWALA YA CLASSE:

Sosa matiti zole—mosi ya mbote, bonso dititi bo zola kudia, ya kitoko. Ya nkaka ta vanda dititi ya mbi, bonso ta pesa mpasi to ya me pola.

KUYANTIKA LESO: Songa dititi mosi ya kele mbote ti mosi ya kele ya mbi. Yula bana inki diswaswanu kele na kati na yo.

KULONGA LESO:

1. Kingana Yesu songaka: Kimfumumu ya Nzambi ke fwanana na muntu kunaka nkeni ya mbote, kansi na nima, mbeni kwisaka kulosa bankeni ya mbi na kati.

Tanga: Matayo 13:24-25

24 Yesu telaka bo kingaka ya nkaka: “Kimfumumu ya Nzambi me fwanana na muntu mosi kunaka bambuma ya mbote ya ble na bilanga na yandi.

25 Kilumbu mosi na mpimpa, ntangu bantu na yandi vandaka me lala, mbeni na yandi kwisaka kukuna bambuma ya matiti ya mbi na kati ya bambuma ya ble, ebuna yandi kwendaka ka yandi.

Yula bana:

- Nkwa-bilanga kunaka bankeni ya inki mutindu?
- Nani kunaka bankeni ya mbi?

Sala théâtre: Bana kuna bankeni ya mbote na bilanga. Muntu mosi ya mbi kwisa na nima na kinsweki yonso, yandi losa bankeni ya mbi na bilanga.

Yimba: Mbeni losaka bankeni ya mbi.

2. Ntangu yo menaka, bantu ya ksalu zolaka katula yina ya mbi.

Tanga: Matayo 13:26-28

26 Ntangu bambuma ya ble menaka, yo butaka bambuma, matiti ya mbi menaka mpi.

27 Bantu ya muntu yango kwisaka kuyula yandi nde: ‘Mfumumu, keti nge kunaka bambuma ya mbote ve na bilanga na nge? Ebuna matiti yai ya mbi me basika wapi?’

28 Yandi vutulaka nde: “Mbeni muntu salaka mpidina.” Bo yulaka yandi nde: “Keti nge me zola nde beto kwenda kutumuna matiti ya mbi?”

Yula bana:

- Bantu ya ksalu yulaka inki questio?
- Nani me sala mambu yina?

www.teachingforafrica.com

Par l'ONG "Ministères pour Chaque Enfant"

- Bantu ya ksalu zolaka kusala inki?

Sala théâtre: Bantu ya ksalu mona matiti ya mbi ti bo kele na makasi. Bo zola katula yo.

Yimba: Bantu ya ksalu zolaka katula matiti ya mbi.

3. Nkwa bilanga buyaka--yo zolaka kubotula mpi matiti ya mbote.

Tanga: *Matayo 13: 29-30*

29 Yandi nde: "Ve, Ntangu beno ke katula matiti ya mbi, mbaimbai beno ta katula mpi bambuma ya ble.

30 Beno bikisa bambuma ya ble ti matiti ya mbi yo kumena kisika mosi tii na ntangu yina ya beto ta katula yo. Na ntangu yina, mono ta songa bantu yina ke katulaka bambuma na kukatula ntete matiti ya mbi ti kukanga yo na mabuki sambu na kulosa yo na tiya; kansi bambuma ya ble mono ta songa bo na kutula yo na nzo yina ya mono ke bumbaka yo."

Yula bana:

- Sambu na inki nkwa-bilanga buyaka nde bo katula matiti ya mbi nswalu?
- Bo ta katula yo na inki ntangu?
- Na ntangu bo katula bima kele na bilanga, bo ta sala inki ti matiti ya mbote?
- Inki ti matiti ya mbi?

Sala théâtre: Nkwa-jardin songa bantu ya ksalu kuinga, kukatula matiti ya mbi ve tii ntangu yo me yela. Na nima yo me yela, yandi songa bo kubuka ntete matiti ya mbi, kuyoka yo tiya, na nima, kubuka matiti ya ble, kutula yo na nzo sika yandi vandaka kubumbaka yo.

Yimba: Sesepiyai beno botula ve matiti ya mbi. Kansi beno ta botula yo na nima.

4. Yesu tendulaka kingana yai.

Tanga: *Matayo 13:36-38*

36 Ntangu yai, Yesu bikisaka bantu. Yandi vutukaka na nzo. Balonguki na yandi kwisaka kutubila yandi nde, « Tendudila beto kingana yina ya matiti ya mbi na bilanga. »

37 Yesu tubaka nde : « Muntu yina kunaka bambuma ya mbote kele Mwana-muntu ;

38 bilanga kele nsi-ntoto ya mvimba ; bambuma ya mbote kele bantu ya Kimfumu ya Nzambi ; bambuma ya mbi kele bantu ya Muntu ya Mbi.

Yula bana:

- Balonguki lombaka Yesu kusala inki?
- Yesu tubaka nde muntu ya kunaka bilanga ikele nani?

Sala théâtre: Muntu mosi kuna bankeni. Yula bana nani muntu ke kuna bankeni. Mvutu: Yesu! Muntu yina basika, muntu ya zole kuna bankeni ya nkaka. Yula bana nani muntu ke kunaka bankeni ya mbi? Mvutu: Satana, mbeni ya Nzambi!

Yimba: Nkwa ya bilanga kele Yesu, beto bakristo kele bilanga n'Yandi.

5. Bawanzio ta katula bantu ya mbi na nsuka ya ntoto.

www.teachingforafrica.com

Par l'ONG "Ministères pour Chaque Enfant"

Tanga: *Matayo 13:39-42*

39 Mbeni yina kunaka matiti ya mbi kele Satana. Ntangu ya kukatula bambuma kele ntangu ya nsuka ya ntoto; bantu yina ke katulaka bambuma kele bawanzio.

40 Mutindu bo ke tulaka matiti ya mbi kisika mosi, bo ke yoka yo na tiya, yo ta vanda mutindu yina mpi na ntangu ya nsuka ya ntoto;

41 Mwana-muntu ta tinda bawanzio na yandi, ebuna bo ta katula na Kimfumu na yandi bantu yina yonso ke bandaka bantu ya nkaka na kusala masumu ti bantu yina yonso ke salaka mbi,

42 bo ta losa bo na dibulu ya tiya. Kuna bo ta dilaka, bo ta kangisaka meno na bo ngolo.

Yula bana:

- Mbeni ya kunaka bankeni ya mbi kele nani?
- Ntangu bo ke kwenda kukatula bambuma kele inki ntangu?
- Bo ya ke katulaka bambuma kele banani?
- Bambuma ya mbi kele banani?
- Bawanzio ta sala inki ti bantu ya mbi?

Sala théâtre: Ndambu ya bana kele bantu ya mbi ya me yamba Yesu ve. Bo kele kusala mambu ya mbi mutindu na mutindu. Na nsuka ya ntoto, bawanzio kwisa kukanga bo, kulosa bo na tiya.

Yimba: Bawanzio ta kanga bantu ya mbi, na nsuka ya ntoto--o mawa!

6. Bantu ya Nzambi ta baka lukumu.

Tanga: *Matayo 13:43*

Ebuna bantu ya Nzambi ta pelaka bonso ntangu na Kimfumu ya Tata na bo. Konso muntu yina ke na makutu, yandi wa ! »

Yula bana:

- Inki ta vanda nsuka ya bantu ya Nzambi?
- Inki mutindu nsuka na bo kele ya diswaswanu ti bantu ya mbi?

Sala théâtre: Bana vanda na zulu ya kiti na lukumu yonso. Bo lwatisa bo mpu ya lukumu.

Yimba: SIKA YA KIESE KE ZULU

MALONGI YA NENE: Na kati ya dibundu, bantu kele mutindu zole--bakristo ya kieleka kele. Bantu ya nkaka mpi ikele ya zaba Yesu kaka na munoko na bo, kansi ya kieleka ve. Yo kele mpasi mingi kuzenga sesepiyai nani kele ya kieleka ti nani kele ya kieleka ve, sambu beto bantu ke zaba ve ntima ya bantu. Kansi Nzambi zaba nani kele bantu na Yandi. Na nsuka ya ntoto, bawanzio ta zenga nani kele muntu ya Nzambi.

MALONGI YA BAKRISTO: Beto mona mpasi ve kana bantu yonso ya tuba bo kele bakristo ke monikaka ve bonso bantu ya kieleka. Beto bika bo na maboko ya Nzambi sambu Yandi zaba nani kele bantu na Yandi. Beto meka ve kuzenga nani kele mukristo to mukristo ve, sambu mbaimbai beto ta sala kifu. Bawanzio ya Nzambi ta sala kusalu yai na nsuka ya ntoto. Nge mukristo, mono

www.teachingforafrica.com

Par l'ONG "Ministères pour Chaque Enfant"

ke pesa nge devoir yai, yantika mposo yai, konso ntangu ya nge zola kuzenga nani kele mukristo ya kieleka, nge tula yo na maboko ya Nzambi kaka.

KUBINGA BANA NA YESU: Ata yo kele mpasi na beto kuzaba nani kele mukristo ya kieleka, yo kele mpasi ve na Nzambi. Yandi zaba kana nge me yamba Yesu ya kieleka, to kana nge kele kaka kukusa. Kana nge ke na mfunu kuyamba Yesu bubu na kieleka yonso, mono ta zola solula ti nge na nima ya ecodim.

LESO 4 YESU TA BAKA BANTU NA YANDI

BAVERSE YA LESO : *Luka 17:26-30,34-36*

KIKUMA YA LESO: Mbote muntu na muntu zikisa mbote kana kieleka yandi kele mwana ya Nzambi, sambu na lumbu ya Yesu ta kwisa vutuka, Yandi ta baka bantu na Yandi, kansi bantu ya nkaka ta bikala, bo ta mona makasi ya Nzambi.

VERSE YA KULONGUKA: *Yoane 14:3*

Ebuna na nima, kana Mono me yidikila beno kisika imene, Mono ta kwisa diaka kubaka beno sambu beno mpi kuvanda ti Mono kuna ya Mono ta vanda.

KUYANTIKA LESO: Sala theatre bonso Yesu ke vutuka. Mwana ya ke sala bonso Yesu telema na zulu ya mesa. Yesu binga bana ya nkaka bo kwisa na Yandi, kansi ya nkaka bikala. Bo ya bikala ke na boma, ke dila, bo ya Yandi binga kele na kiese.

KULONGA LESO:

1. Yesu songaka yo ta vanda inki mutindu na ntangu Yandi kwisa.

Tanga: *Luka 17:26-27*

26 Mambu yina bwaka na ntangu ya Noa, yo ta bwa mpi mutindu mosi na ntangu ya Mwana-muntu.

27 Bantu vandaka kudia, kunwa, kukwelana, tii kilumbu yina ya Noa kotaka na maswa; masa fulukaka mingi na ntoto yonso, ebuna yo fwaka bo yonso.

Yula bana:

- Yesu tubaka nde ntangu Yandi vutuka, yo ta vanda bonso yo mpi na bilumbu na ntwala inki kusalamaka?
- Na bilumbu ya Noa, bantu vandaka kuyindula Nzambi ve, kansi bo vandaka kaka kuyindula inki?

Sala théâtre: Bantu ke sakana mingi, ebuna mvula yantika kunoka, masa fuluka na ntoto ti kufwa bo yonso. (Mwana mosi songa na bageste mutindu masa fulukaka na ntoto.)

Yimba: Bantu mingi ta yilama ve, kansi Yesu ta kwisa!

2. Bantu ta yindula ve nde Yesu ta kwisa, kansi Yandi ta kwisa kuvutuka.

Tanga: *Luka 17:28-30*

28 Yo ta vanda mutindu mosi bonso na ntangu ya Loti : bantu vandaka kudia, kunwa, kusumba bima, kuteka bima, kukuna bilanga ti kutunga banzo.

29 Kansi kilumbu yina ya Loti katukaka na bwala Sodome, Nzambi nokisaka tiya ya ngolo bonso mvula ; yo kwisaka kufwa bantu ya bwala yina yango.

30 Kilumbu yina ya Nzambi ta songa Mwana-muntu na meso ya bantu yo ta vanda mutindu mosi.

Yula bana:

- Loti kwendaka kuzinga na bwala ya mbi Sodomi. Bantu kuna vandaka kuyindula inki

www.teachingforafrica.com

Par l'ONG "Ministères pour Chaque Enfant"

mambu?

- Nzambi basisaka Loti ti fami na yandi, ebuna yandi fwaka bantu ya Sodomi na inki?
- Ketu bo banzaka nde Nzambi ta kufwa bo?
- Inki mutindu mambu yina kele bonso kuvutuka ya Yesu ?

Sala théâtre: Bantu ya Sodomi ke sakana mingi na mbi na bo. Wanzio basisa Loti ti fami na yandi, ebuna Nzambi nokila bantu ya Sodomi tiya, bo yonso kufwa.

Yimba: Bantu mingi ta yilama ve, kansi Yesu ta kwisa!

3. Kiteso mosi, Yesu ta kwisa nswalu na ntangu ya bantu ke yindula ve, kansi bantu yonso ta kwenda ve ti Yandi.

Tanga: *Luka 17: 34*

34 Mono ke tubila beno nde na mpimpa yina babakala zole ta vanda na mbeto mosi : bawanzio ta baka mosi, ebuna bo ta bikisa mpi mosi.

Yula bana:

- Bantu zole ta vanda wapi ntangu Yesu ta kwisa?
- Ikwa ta kwenda ti Yandi?
- Ikwa ta kwenda ve ti Yesu, kansi banwanzio ta bikisa bo?
- Inki kele diswaswanu na kati ya bantu yai zole? (Mosi yambaka Yesu ti mosi yambaka Yandi ve.)

Sala théâtre: Ke songa bana zole ke lala mpongi, mosi kwenda ti Yesu ti mosi kwenda ve.

Yimba: Bantu zole na zulu ya mbeto mosi ta kwenda ti mosi ta bikala!

4. Bakristo ta kwenda kuvanda ti Yesu, kansi bo ya zaba Yesu ve, bo ta kwenda ve ti Yandi.

Tanga: *Luka 17:35*

35 Bankento zole ta vanda ke tuta fufu kisika mosi : bawanzio ta baka mosi, ebuna bo ta bikisa mpi mosi.

Yula bana:

- Bankento zole ta vanda kusala inki ntangu Yesu ta kwisa?
- Ketu bo yonso zole ta kwenda ti Yesu?
- Yina ya ta kwenda ikele yina ya me sala inki?

Sala théâtre: Bana sala bageste ya ke songa bamama zole ke tuta manioko. Bawanzio ya Nzambi kwisa. Mosi kwenda ti Yesu ti mosi kwenda ve.

Yimba: Bamama zole kele kututa manioko--mosi ta kwenda na yandi, ti mosi ta bikala!

5. Kiese na bo ya ta kwenda ti Yesu, mawa na bo ya ta bikala!

Tanga: *Luka 17:36*

36 (Babakala zole ta vanda na kilanga mosi : bawanzio ta baka mosi, ebuna bo ta bikisa mpi

www.teachingforafrica.com

Par l'ONG "Ministères pour Chaque Enfant"

mosi.)

Yula bana:

- Babakala zole ta vanda wapi ntangu Yesu ta vutuka?
- Nge banza bo ta vanda kusala inki?
- Keti bo yonso zole ta kwenda ti Yesu?

Sala théâtre: Babakala zole kele sala na bilanga. Mosi ta kwenda ti Yesu ti mosi ta bikala.

Yimba: Babakala zole kele na bilanga
Mosi ta kwenda ti mosi ta bikala!

MALONGI YA NENE: Bakristo ta kwenda ti Yesu ntangu Yandi ta vutuka.

MALONGI YA BAKRISTO: Beto zola kuzinga na kintwadi ya mbote ti Yesu sambu beto vanda ve na nsoni ntangu Yandi ta kwisa vutuka. Keti mpila nge ke zinga ta pesa nsoni kana Yesu kuta nge na mambu yina? Sala théâtre ke songa bana ya nkaka ke sala mambu ya mbi, ke mona nsoni ntangu Yesu kuta bo. Groupe ya zole ke sala mambu ya mbote, ke mona kiese ntangu Yesu kuta bo. Mono zola kupesa beno bakristo devoir yai : Na mposho yai, beno yindula na konso yina ya nge ke sala, keti mono ta vanda na kiese nde Yesu kukuta mono kusala mambu yai ?

KUBINGA BANA NA YESU: Kana nge me yamba Yesu na ntima na nge ntete ve, nge ta kwenda ve ti Yesu na ntangu Yandi ta kwisa vutuka. Mbote nge yamba Yesu bubuyai, sambu Yesu ta ndima nge na lumbu Yandi ta vutuka. Mono ta vanda na kiese na kusadisa nge na nima ya ecodim.

BANKUNGA YA KWENDA NZILA MOSI TI LESO:
YESU KRISTO, MFUMU 'A BETO TA KWISA DIAKA (Kintwadi 165)

SIKA YA KIESE KE ZULU

MONO KELE NA NZO KITOKO

Mo' Kwikila Bible-verse ya nsuka, YESU KELE KWISA

BIMA YA KUSONGA: Basika na nganda, tala matuti na zulu. Yesu tombukaka na kati ya matuti; Yandi me sila nde Yandi ta vutuka kiteso mosi.

LESO 5 MAMBU YA FIOTI LENDA VANDA MFUNU MINGI

BAVERSE YA LESO : *Marko 4:26-32*

KIKUMA YA LESO: Zaba nde, mambu ya kimpeve kele mfunu mingi, ata bantu mona yo mfunu mingi ve. Ebuna mbote beto sosa ntete kimfumu ya Nzambi--kupesa kiese na Mfumu na beto.

VERSE YA KULONGUKA: *Matayo 6:20*

Kansi beno bumba kimvwama na zulu; kuna baniamama lenda dia yo ve, yo lenda bwa matadi ve, bamiyibi lenda kota mpi ve na kuwenda kuyiba.

KUYIDIKA NA NTWALA YA CLASSE :

Sosa bankeni ya kele fioti mingi, ya ta vanda mpasi kumona kana nge losa yo na zulu ya ntoto.

KUYANTIKA LESO: Songa bankeni ya fioti-fioti. Losa mosi na zelo, songa mpila yo kele mpasi kumona yo. Yo kele kima mosi ya fioti, ke monikaka bonso mfunu ve. Kansi yo kele mfunu mingi, sambu kana yo yela, yo ta buta nti to matiti ya nene.

KULONGA LESO:

1. Kimfumu ya Nzambi ke fwanana na nkeni ya kele na ntoto. Yo mosi kele kumena, kuyela, kubuta.

Tanga: *Marko 4:26-27*

26 Yesu tubaka diaka nde: "Kimfumu ya Nzambi me fwanana na muntu mosi yina ke kwendaka kukuna bambuma ya ble na bilanga.

27 Na mpimpa yandi ke lala, na mwini yandi ke kwenda kuluta, ble me mena; yo ke yela kansi yandi ke zaba ve kana nki mutindu yo ke mena ti yo ke yela.

Yula bana:

- Inki mutindu nkeni kele kusonga kimfumu ya Nzambi?
- Nani lenda bakisa mpila nkeni kele kumena na ntoto?
- Nani lenda tendula mpila nti ke yela na ntoto ?

Sala théâtre: Muntu kuna bilanga, na nima yandi vutuka, ti yandi mona mpila bankeni kele kumena.

Yimba: Kimfumu ya Nzambi kele kuyela bonso nkeni na ntoto!

2. Kimfumu ya Nzambi lenda vutuka na nima ve. Yo kele kuyela kaka konso ntangu.

Tanga: *Marko 4:28-29*

28 Bambuma ya ble ke mena yo mosi na ntoto: ntete yo ke basisa banti na yo, na nima matiti, ebuna bambuma ya nkaka ya kuyela.

29 Kana bambuma me yela imene, muntu yina ke yantika kusala ti mbele na yandi, sambu ntangu ya kukatula bambuma me lunga."

Yula bana:

- Kana nkeni me yela, na nsuka nge ta baka inki?

Sala théâtre: Bana sala bageste bonso bo ke katula bambuma kele na bilanga.

Yimba: Kimfumu ya Nzambi kele kuyela bonso nkeni!

3. Kimfumu ya Nzambi ke fwanana na nkeni mosi ya kuluta fioti. Yo kele monikaka bonso kima mosi ya mpamba, kansi kana yo me yela, yo kuma nti mosi ya nene ti ya mfunu.

Tanga: Marko 4:30-32

30 Yesu yulaka bo nde “Na nki kima beto lenda fwanikisa Kimfumu ya Nzambi? To beto lenda tendula yo na nki kingana?

31 Yo me fwanana na mambu mosi ya mwa-nti yai mutarde. Mbuma yina, kana bo kuna yo na ntoto, yo kele mbuma mosi ya kuluta fioti na kati ya bambuma yonso.

32 Kansi kana bo me kuna yo, yo ke menaka, yo ke kumaka ya nda mpenza kuluta bamwa-nti yonso. Yo ke basisaka balutangu ya nene. Mpidina bandeke lenda kwisa kutula babuyamba na bo na kati ya balutangu na yo. »

Yula:

- Keti nkeni ya fioti ke monika bonso kima ya mfunu mingi?
- Kansi kana yo yela, keti yo ta vanda diaka fioti?
- Yo ta vanda inki mutindu?

Sala théâtre: Bantu kuna nkeni ya fioti, na nima yo me yela bo yituka yo me kuma nti ya nene ya inki mutindu .

Yimba: Kimfumu ya Nzambi me luta mfunu--yo ikele mambu ya nene!

MALONGI YA NENE: Ata bantu mona mambu ya kimpeve mfunu mingi ve, yo kele mambu mosi ya kuluta mfunu. Sesepiyai yo ke monika bonso nkeni ya fioti, ya mpamba. Kansi na lumbu ya Yesu ta kwisa kuyala, bantu yonso ta mona nde yo vandaka mambu ya kuluta mfunu.

MALONGI YA BAKRISTO: Mbote beto sosa ntete kimfumu ya Nzambi--inki mutindu beto lenda pesa kiese na Mfumu na beto. Bana tuba mambu ya lenda pesa Mfumu kiese--sonika yo na tableau. Meka kusala liste ya mambu kumi. (Longi, binga bana kumi na kusonga mambu yina na mwa-theatre.)

KUBINGA BANA NA YESU: Mbala ya nkaka nge me mona mambu ya Nzambi kima ya mfunu mingi ve. Yo yina nge me yamba Yesu ntete ve na luzingu na nge. Kansi bubu nge zola kuyamba Yandi. Mono ta vanda na kiese na kusolula ti nge na nima ya ecodim bubuyai.

BANKUNGA YA KWENDA NZILA MOSI TI LESO:

SOSA NTETE KIMFUMU YA ZULU

MWINI FIOTI NA MONO, BIKA YO MONIKA

LESO 6 BETO LOLULA BETO NA BETO

BAVERSE YA LESO: *Matayo 18:21-35*

KIKUMA YA LESO: Kubakisa nde, Nzambi zola nge kuwila bantu ya nkaka mawa, mutindu Yandi wilaka nge mawa. Kana nge me yamba Yesu Kristo, Nzambi me lolula mbi yonso ya nge salaka Yandi. Yo yina nge mpi fweti lolula bantu ya nkaka ya me sala nge mbi.

VERSE YA KULONGUKA: *Matayo 18:33*

Nge mpi nge zolaka kuwila mpangi na nge mawa mutindu mono mosi wilaka nge mawa.

KUYANTIKA LESO: Sala theatre ya mwana ya zola ve kulolula mpangi na yandi mbi ya yandi me sala. Tuba nde yandi kele na mfunu na kuwa kingana mosi ya Yesu longaka.

KULONGA LESO:

1. Piere zolaka kuzaba mbala ikwa yandi fweti lolula mpangi na yandi.

Tanga: *Matayo 18:21-22*

21 Ntangu yai, Piere kwisaka kuyula Yesu nde : « Mfumu, kana mpangi na mono ke salaka mono kaka mbi, mbala ikwa mono fweti lolula yandi ? Mbala nsambwadi (7) ve ?

22 Yesu vutulaka nde : « Ve, mbala nsambwadi ve, kansi nsambwadi mbala makumi nsambwadi (7x70).

Yula bana:

- Piere banzaka nde yandi lenda lolula muntu mbala ikwa?
- Inki vandaka mabanza ya Yesu?
- 70x7 ikele mbala ikwa?
- Kana muntu meka kubambuka mbala ikwa yandi me lolula muntu, yandi lenda bambuka mbala yina yonso?
- Inki Yesu zolaka kutuba?

Sala Théâtre: Piere yula questio yai na Yesu, bonso na kingana. Yesu pesa mvutu.

Yimba: Beto lolula muntu mbala ikwa? Beto lolula muntu mbala mingi, to kukonda nsuka, kulolula yandi kaka.

2. Yesu songaka kingana kusonga mpila beto fweti lolula muntu: Mfumu songaka bantu ya kusalu kufuta bamfuka na bo, ebuna yandi monaka nde sielo mosi vandaka na mfuka ya nene.

Tanga: *Matayo 18:23-24*

23 Sambu Kimfumu ya Nzambi me fwanana na mfumu yina zolaka nde bantu na yandi ya kusalu yina vandaka na bamfuka na yandi, bo futa yo.

24 Ntangu yandi me yantika kaka na kusala mpidina, bo kwisaka kunatila yandi muntu mosi na kati ya bantu na yandi ya kusalu, yina vandaka na mfuka na yandi ya bamilio ya mbongo.

Yula bana:

- Sielo vandaka na mfuka ya ikwa?

www.teachingforafrica.com

Par l'ONG "Ministères pour Chaque Enfant"

- Yandi fweti futa yo na nani?

Sala Théâtre: Bana sala bageste ya ke songa mfumu ke tala rapport ya kisalu, ke mona ke sielo mosi ke na mfuka ya nene. Yandi binga sielo yina.

Yimba: Sielo mosi vandaka na mfuka ya nene!

3. Sielo yina bondilaka Mfumu kuwila yandi mawa

Tanga: Matayo 18:25-26

25 Muntu yina vandaka na mbongo ya kufwana ve na kufuta mfuka yina; yo yina mfumu na yandi songaka bantu na yandi na kuteka yandi bonso mpika, ti nkento ti bana na yandi ti bima yonso ya yandi vandaka na yo, sambu na kufuta mfuka yina.

26 Muntu yina ya kisalu fukamaka na makulu ya mfumu na yandi. Yandi bondilaka yandi nde: 'Pardo, wila mono mawa, mono ta futa mfuka na nge yonso!'

Yula bana:

- Inki mutindu mfumu zolaka sielo kumanisa mfuka na yandi?
- Inki mutinbdu sielo bondilaka mfumu?
- Yandi silaka kumanisa ikwa ya mfuka na yandi?

Sala Théâtre: Mwana mosi sala bonso mfumu ke na makasi sambu na mfuka, ke songa bantu ya yandi kusimba muntu ya kisalu yina, nkento, ti bana, bo yonso kuma bampika na yandi. Kansi sielo kudilosa na ntoto, yandi bondila Mfumu ngolo kuwila yandi mawa ti pesa yandi ntangu sambu na kumanisa mfuka yonso.

Yimba: Sielo bondilaka nde, Wila mono mawa!

4. Mfumu wilaka yandi mawa na mfuka yina ya nene.

Tanga: Matayo 18:27

27 Mfumu yina wilaka yandi mawa: yandi landaka mfuka yina diaka ve, kansi yandi tubilaka yandi nde: 'Kwenda ka nge.'

Yula bana: Mfumu zengaka mambu yai inki mutindu?

Sala Théâtre: Mfumu lolula sielo na yandi.

Yimba: Mfumu lolulaka yandi mfuka, mfuka mosi ya nene !

5. Na nima, sielo yina monaka muntu ya vandaka na yandi mfuka ya fioti, ebuna yandi kangaka muntu yina na kingolo-ngolo.

Tanga: Matayo 18:28

28 « Ntangu muntu yina basikaka, yandi kwendaka kukutana na nduku na yandi ya kisalu ; muntu yango vandaka na mfuka na yandi ya mbongo kansi mingi ve. Yandi kangaka yandi, ebuna yandi simbaka yandi na nkingu nde : 'Futa mfuka na mono !'

Yula bana:

- Sielo monaka nani?
- Mfuka ya muntu yina vandaka inki mutindu?
- Yandi salaka muntu yina inki?

Sala Théâtre: Sielo kanga muntu ya nkaka sambu na mfuka na yandi ya fioti.

Yimba: Sielo kangaka muntu ya nkaka,
Ti wilaka yandi mawa ve,
Ata mfuka na yandi vandaka
Mosi ya fioti.

6. Sielo buyaka kuwila muntu yina mawa.

Tanga: *Matayo 18: 29-30*

29 Muntu yango bwaka na ntoto. Yandi bondilaka yandi nde: 'Wila mona mawa, mono ta futa mfuka na nge!'

30 Kansi yandi zolaka ve; yandi kwendaka kutula muntu yango na boloko tii kuna ya yandi fweti futa mfuka.

Yula bana:

- Muntu ya vandaka na mfuka, yandi bondila sielo inki mutindu?
- Keti kudila na yandi vandaka kiteso mosi bonso sielo dilaka na mfumu na yandi, to yo vandaka mutindu ya nkaka?
- Inki vandaka mvuta ya sielo?

Sala Théâtre: Muntu ya mfuka ke bondila sielo kuwila yandi mawa, sielo ke buya, yandi kanga muntu yina ya boloko.

Yimba: Sielo buyaka kulolula yandi. Mawa, o mawa!

7. Ntangu mfumu waka yo, yandi vandaka na makasi, yandi lombaka diaka mfuka na yandi.

Tanga: *Matayo 18: 31-34*

31 "Ntangu bantu ya nkaka ya ksalu monaka mambu yina kubwaka, bo monaka mawa mingi. Ebuna bo kwendaka kutubila mfumu na bo mambu yonso.

32 Mfumu na bo bingaka muntu yina ya ntete, yandi tubilaka yandi nde: 'Nge kele muntu mosi ya mpamba! Nge bondilaka mono na kulanda diaka ve mfuka yina yonso ya nge zolaka kupesa mono, ebuna mono ndimaka.

33 Nge mpi nge zolaka kuwila mpangi na nge mawa mutindu mono mosi wilaka nge mawa.'

34 Mfumu waka makasi mingi mpenza, ebuna yandi tulaka muntu yina na boloko sambu na kubaka ndola tii kuna ya yandi fweti futa mbongo yonso."

Yula bana:

- Inki mutindu mfumu zabaka mambu yai?
- Inki mutindu yandi monaka mpila ya sielo na yandi salaka?
- Sambu na inki yandi vandaka na makasi?
- Inki ndola yandi pesaka na sielo yina?

www.teachingforafrica.com

Par l'ONG "Ministères pour Chaque Enfant"

Sala Théâtre: Mfumu kuwa mambu yina, ke na makasi.

Yandi songa nde bo kanga sielo, bo tula yandi na boloko tii yandi manisa mfuka na yandi.

Yimba: O sielo! Bo lolulaka nge mfuka! Mbote nge lolulaka mpangi na nge mpi!

8. Yesu tubaka nde, kana beto lolula ve bantu ya nkaka, Nzambi ta lolula beto mpi ve.

Tanga: Matayo 18: 35

35 Na kumanisa, Yesu tubaka nde: "Tata na mono kele na zulu ta sala beno mutindu mosi mpi, kana muntu kubikila mpangi na yandi ya nkaka mfuka ve na ntima yonso."

Yula bana:

- Kana beto zola Nzambi kulolula beto, beto fweti sala inki?

Sala Théâtre: Yesu ke longa bantu nde beto fweti lolula bantu ya nkaka.

Yimba: Beto lolula bantu ya nkaka, sambu Nzambi me lolula beto.

MALONGI YA NENE: Nzambi me lolula beto bakristo mfuka ya nene: masumu yonso na beto. Ebuna Yandi zola beto kulolula mpi bantu ya nkaka ya me sala beto mbi.

MALONGI YA BAKRISTO: Beto lolula beto na beto. Manisa théâtre ya beno salaka na luyantiku. Muntu yina ta lolula mpangi na yandi ti bo ta vanda banduku diaka. Vanda na ntangu ya lombilu ya bana lenda tanga na ntwala ya Nzambi bantu ya bo zola lolula. Pesa bo devoir kukwenda na bantu yina kusala bo mbote to kusala kinduku diaka.

KUBINGA BANA NA YESU: Nzambi me lolula masumu ya beto bakristo. Kansi kana nge me yamba Yesu ntete ve na ntima na nge, Yandi me lolula masumu na nge ve. Nge me bikala kaka na masumu na nge. Kansi bubuyai Nzambi zola lolula nge. Yo ke lomba nge yamba Yesu Kristo na ntima na nge. Mono ta vanda na kiese na kusolula ti nge na nima ya ecodim sambu na mambu yai.

BANKUNGA YA KWENDA NZILA MOSI TI LESO:

KIZITU YONSO MENE KATUKA

KWISA NA YESU KRISTO, verse 2--Menga na Yandi ta lunga, kukatula imbi!

BETO ZOLANA

ZOLA, BETO BAKA YO

LESO 7 BANTU YA KISALU WILA MPANGI NA BO KIMPALA

BAVERSE YA LESO: *Matayo 20:1-15*

KIKUMA YA LESO: Kubakisa nde Nzambi zola kimpala ve, ebuna beto kuwa kimpala ve sambu na mambu ya mbote ke kwisila bantu ya nkaka. Beto vanda na kiese sambu na bo.

VERSE YA KULONGUKA: *Kitoko 8:6b*

Amure kele ngolo bonso lufwa, kimpala kele nku bonso nsi ya bafwa.

KUYANTIKA LESO: Sala théâtre ke songa bantu kele na kimpala sambu na bampangi na bo. Tuba nde bo ke na mfunu na kulonguka kingana yai ya Yesu vandaka kutuba:

KULONGA LESO:

1. Muntu wakanaka ti bantu ya kusalu sambu na lufutu ya lumbu mosi ya kusalu.

Kutanga: *Matayo 20:1-2*

1 Kimfumu ya Nzambi me fwanana na muntu yina vandaka na bilanga ya vinu. Na suka-suka yandi kwendaka kusosa bantu na kwisa kusala na bilanga na yandi.

2 Bo wakanaka nde yandi fwati futa bo ntalu ya kufwana, kibende mosi ya mbongo na kilumbu mosi. Ebuna yandi tindaka bo na kwenda kusala na bilanga ya vinu.

Kuyula bana:

- Bantu ya kusalu yantikaka kusalu ntete na inki l'heure?
- Bo ta baka inki salaire?
- Keti bo ndimaka lufutu yina na ntwala kuyantika kusalu?

Kusala Théâtre: Muntu sosa bantu na kusala lumbu mosi na bilanga na yandi, bo wakana na lufutu. Bo vandaka na kiese !

Kuyimba: Bantu ya kusalu yantikaka na suka, bo me wakana na lufutu na bo.

2. Na nima ya ntangu yandi tindaka bantu ya nkaka mbala iya.

Kutanga: *Matayo 20:3-5*

3 Na nevere (9h) ya suka yandi basikaka diaka, yandi kwenda na zandu, yandi mona bantu ya nkaka me telema kuna, bo ke na kusalu ve.

4 Ebuna yandi tubilaka bo nde: 'Benno mpi beno kwisa kusala na bilanga na mono ya vinu, ebuna mono ta futa bono na ntalu ya kufwana.;

5 Ntangu yai, bantu yina kwendaka kusala. Ebuna mfumu yina kwendaka kusosa bantu ya nkaka na midi ti twazere (15h) ya nkokila.

Kuyula bana:

- Kimvuka ya zole ya bantu ya kusalu yantikaka na inki ntangu?
- Mfumu monaka bo wapi?
- Bo wakanaka inki mutindu na mambu ya lufutu?

- Kimvuka ya zole yantikaka na inki ntangu?
- Kimvuka ya tatu?
- Kimvuka ya iya?
- Bo wakanaka inki mutindu na mambu ya lufutu?

Kusala Théâtre: Mfumu sosa bantu ya ksalu ya nkaka ti yandi tinda bo na bilanga mbala tatu.

Kuyimba: Bantu ya nkaka yantikaka na nima, bo yonso wakanaka mbote.

3. Na nsuka ya lumbu, yandi futaka bo yonso kiteso mosi, bonso yandi me wakana ti bo kusala.

Kutanga: *Matayo 20:7-10*

7 Bantu yina nde : ‘Ata muntu mosi ve me baka beto na ksalu.’ Yandi nde : « Mambu ve, beno mpi kwisa na bilanga na mono ya vinu. »

8 « Ntangu mpimpa yantikaka kubwa, munkwa-bilanga yina tubilaka kapita na yandi ya ksalu nde : « Binga bantu yina, ebuna futa bo mbongo na bo ; yantika kufuta ntete bantu yina me kwisa na nima, ebuna na nima, nge futa bantu yina kwisaka na ntwala. »

9 Bantu yina yantikaka ksalu na senkere (17h) ya nkokila, bo bakaka kibende mosi-mosi ya mbongo konso muntu.

10 Ebuna bantu yina kwisaka na ntwala, ntangu bo kwisaka kubaka mbongo na bo, bo vandaka kuyindula nde bo ta baka mbongo mingi, kansi bo mpi bo bakaka kibende mosi-mosi na konso muntu.

Kuyula bana:

- Bo futaka nani ntete?
- Nani na nima?
- Bo futaka bo yonso ikwa?
- Keti yai vandaka mpila bo me wakana?

Kusala Théâtre: Bana sala bonso mfumu ya ksalu, ke futa bantu yonso kiteso mosi, ata bo ya yantikaka na ntangu ya mbote, ata bo ya yantikaka na retard.

Kuyimba: Bo futaka konso muntu kiteso mosi.

4. Bantu ya salaka kuluta vandaka na makasi, bo wilaka bantu ya nkaka kimpala sambu bo bakaka lufutu kiteso mosi bonso bo.

Kutanga: *Matayo 20:11-12*

11 Ntangu bo bakaka mbongo na bo, bo yantikaka kubokutila munkwa-bilanga

12 nde: ‘Bantu yai ya nge me baka na nima na beto bo me sala kaka lere mosi, ntangu beto ke sala kilumbu ya mvimba na kati ya mwini, ebuna nge me futa bo kiteso mosi na beto!’

Kuyula bana:

- Bantu ya yantikaka ksalu na suka monaka yo inki mutindu?
- Bo salaka inki?

Kusala Théâtre: Bantu ya ksalu ya ntete kele kubokuta.

Kuyimba: Bantu vandaka kubokuta mingi.

**5. Kansi mfumu ya ksalu tubaka nde, ve, mono me pesa beno yina ya beto me wakana.
Kana mono wila bo mawa, beno lenda wila bo kimpala ve.**

Kutanga: *Matayo 20:13-15*

13 Munkwa-bilanga tubilaka muntu mosi na kati na bo nde: 'Nduku na mono, wa fioti; mono me sala beno mbi ve. Keti beto wakanaka ti nge ve nde nge ta sala ksalu ya kilumbu mosi sambu na kibende mosi ya mbongo?'

14 Baka mbongo na nge, kwenda na nzo na nge. Mono zola pesa muntu yai ya mono me baka na nima mutindu mosi bonso mono me pesa nge.

15 Keti mono ke na nswa ve na kusala mutindu mono me zola na mbongo na mono mosi? To ne ke tula kimpala kaka sambu mono me sala mbote?' "

Kuyula bana:

- Inki mvutu mfumu pesaka bantu ya vandaka kubokuta?
- Keti yandi kusaka bo?
- Keti yandi yibaka bo?
- Na bo ya yantikaka ksalu na nima, yandi wilaka bo inki? (Mawa)

Kusala Théâtre: Mfumu ke pesa mvutu na yandi.

Kuyimba: Nzambi kele kuzola kimpala ve!

MALONGI YA NENE: Bantu ya ksalu ya ntete vandaka na kimpala kaka sambu mfumu ya ksalu wilaka bantu ya nkaka mawa. Mbote bo vandaka na kiese sambu na bampangi yina, kansi bo wilaka bo kimpala. Kimpala yina vandaka mbote ve.

MALONGI YA BAKRISTO: Solula inki mambu bo ke wa kimpala. Solula Nzambi zola bo kumona yo inki mutindu? (Kuvanda na kiese sambu na mambote ya ke kwisa na bantu ya nkaka.) Songa theatre ya ke songa mpila ya mbote kusala ti kutuba kana mpangi na nge me mona mambu ya mbote, ata nge me mona mambu ya mbote yina ve. Lomba lusadisya ya Nzambi na mambu yai.

KUBINGA BANA NA YESU: Mambu yai kele ngolo, kana nge me yamba Yesu ntete ve na ntima na nge, nge ta vanda na mpila ve kulungisa yina ya Nzambi ke zola. Kana nge ke sosa kaka bubu kutula ntima na Yesu, kuyamba Yandi bonso Mvulusi ti Mfumu na nge, mono ta vanda na kiese kusolula ti nge na nima ya ecodim.

BANKUNGA YA KWENDA NZILA MOSI TI LESO:

O KEBA NTIMA INKI NGE ZOLA (Kimpala ve!)

BETO ZOLANA

ZOLA, BETO BAKA YO

O KIMPALA (O Kimpala) O KIMPALA YAMBULA

www.teachingforafrica.com

Par l'ONG "Ministères pour Chaque Enfant"

LESO 8 NZO YA TELEMAKA, TI NZO YA BWAKA

BAVERSE YA LESO: Luka 6:46-49

KIKUMA YA LESO: Lukwikilu ya kieleka ke monikaka na mpila muntu ke lemfuka na Yesu. Beto kundima mpamba ve, kansi beto lemfuka na Yesu na yonso Yandi zola songa beto na Bible, ndinga na Yandi.

VERSE YA KULONGUKA: *Luka 6:46*

Sambu na nki beno ke bingaka mono: "Mfumu, Mfumu," kansi beno ke salaka ve mambu yina ya mono ke tubilaka beno?

KUYIDIKA NA NTWALA

Tala BIMA YA KUSONGA na nsuka ya lesu yai. Yidika kusonga mosi ya bima yina, kana mpila ikele.

KUYANTIKA LESO: Sala théâtre ke songa bana zole ke wa ndinga ya Nzambi. Na nima, bo basika na nzo Nzambi. Mosi kele lemfuka na Nzambi, mosi ke sala mambu mingi ya potopoto. Yula bana keti bo yonso zole waka ndinga ya Nzambi. Yula bo diaka inki diswaswani kele na kati na bo zole.

KULONGA LESO:

1. Yesu nganinaka bantu, "Sambu na inki beno ke binga mono, Mfumu, kansi beto lemfuka ve na yina Mono tuba?"

Tanga: *Luka 6:46*

Sambu na nki beno ke bingaka mono: "Mfumu, Mfumu," kansi beno ke salaka ve mambu yina ya mono ke tubilaka beno?

Yula bana:

- Inki Yesu yulaka bantu?
- Sambu na inki Yesu vandaka na kiese ve?
- Kana muntu kele mfumu, beto fweti lemfuka na yandi?
- Kana beto lemfuka na Yesu ve, yo kele kusonga inki?

Sala Théâtre: Mwana mosi sala bonso Yesu. Bantu binga yandi Mfumu, ebuna yandi yula Sambu na inki bo ke lemfuka na yandi ve.

Yimba: Yimba Luka 6:46 na nkunga.

2. Yesu tubaka kingana yai kusonga inki mutindu bantu kuwa ndinga na Yandi ti sala yina ya bo kuwa:

a. Muntu tungaka nzo. Yandi timaka ntoto na nsi mingi, yandi tulaka nzo na fondement ya matadi.

www.teachingforafrica.com

Par l'ONG "Ministères pour Chaque Enfant"

Tanga: Luka 6:48a

48a Yandi me fwanana na muntu mosi tungaka nzo. Muntu yina timunaka dibulu ya nda. Yandi tulaka fondasio na zulu ya matadi.

b. Mvula nokaka ngolo, kansi masa fwaka nzo yina ve.

Tanga: Luka 6:48b

48b Ntangu nzadi fulukaka na masa ya mvula, masa basikaka na nseke, yo kwendaka kubula na nzo yina. Kansi nzo yango nikanaka ve, sambu yandi tungaka yo mbote.

Yula bana:

- Muntu ya lemfuka na Yesu kele bonso nani?
- Nzo ya bo me tunga na zulu ya ditadi, yo ta kubwa nswalu?
- Yo ta vanda inki mutindu?

Sala Théâtre: Tima dibulu, sala fondement ya ngolo ya ciment. Tunga nzo na zulu na yo. Masa ya ngolo bula nzo yina, kansi yo kubwa ve.

Yimba: Bo tungaka nzo na zulu ya matadi, ti yo kubwaka ve!

3. Yesu tubaka nde bantu ya kuwa ndinga na Yandi kansi bo sala ve yina ya bo me wa, ke fwanana na muntu ya tungaka nzo na zulu ya zelo.

Tanga: Luka 6:49

49 Ebuna muntu yina ke wa mambu na mono kansi ke landa yo ve, yandi me fwanana na muntu mosi tungaka nzo na yandi na ntoto, kukonda fondasio. Ntangu masa ya nzadi bulaka yo, yo bwaka na mbala mosi, ebuna yo fwaka mvimba. »

Yula bana:

- Muntu ya lemfuka na Yesu kele bonso nani?
- Nzo ya bo me tunga na zulu ya zelo, kukonda fondement, yo ta vanda inki mutindu?
- Inki lenda bebisa yo nswalu?

Sala Théâtre: Tunga nzo kaka mpidina na zulu ya zelo, kukonda fondement. Masa ti mupepe ya ngolo bula yo, nzo yonso kubwa na ntoto.

Yimba: Bo tungaka nzo na zulu ya zelo--o-o-yo kubwaka ngolo!

MALONGI YA NENE: Bantu ya lemfuka na ndinga ya Yesu kele bonso bantu ya tunga nzo ya ngolo na zulu ya ditadi.

MALONGI YA BAKRISTO: Yo kele mbote na kuwa ndinga ya Nzambi. Kansi konso ntangu beto kuwa yo, Yesu ke lomba beto kukwenda kusala yina ya beto me longuka. Solula inki malongi bo me wa na ngonda me luta (na ecodim, bisambu, bisambu ya ecole, etc.). Solula inki mutindu bo lenda sala yina ya bo me longuka. Pesa bo devoir kukwenda mposo yai kusala mambu mosi kulemfuka na yina ya bo me wa.

KUBINGA BANA NA YESU: Mambu ya ntete-ntete ya Yesu kele kulomba ya konso muntu ikele kuyamba Yandi na ntima, kundima Yandi bonso Mvulusi ti Mfumu. Kana nge me kwikila Yesu ntete ve, ebuna yonso ya nge sala lenda pesa Yandi kiese ve. Kana nge me bakisa nde, nge me ndima Yandi ntete ve, kansi bubu nge zola ndima Yandi, mono ta solula ti nge na nima ya ecodim. Mono ta vanda na kiese kusadisa nge.

BANKUNGA YA KWENDA NZILA MOSI TI LESO:

TULA NTIMA NA KULEMFUKA (Kintwadi No. 2)

KUMISA NZAMBI, NA KIESE (verse 2--Lemfuka bubu, na kiese!)

BIMA YA KUSONGA:

Kana nzo ya mbote ti nzo ya kubwa kele penepene, beno basika ti bana, beno kwenda kutala yo. Songa bana nde bo ya sala ve malongi ya bo ke wa, luzingu na bo ta vanda bonso nzo yina ya kubwa.

To, songa zelo ti ditadi ou kitini ya ciment. Yula bana inki ta vanda fondement ya mbote sambu na kutunga nzo ya nene--zelo to cement.

LESO 9 INKI ME LUTA MFUNU-- YINA BETO TUBA TO YINA BETO SALA?

BAVERSE YA LESO : *Matayo 21:28-32*

KIKUMA YA LESO: Zaba nde, lukwikilu ya kieleka ikele ve kaka kundima na munoko. Lukwikilu ya kieleka ke monikaka mpi na bisalu ya muntu ke sala.

VERSE YA KULONGUKA: Luka 6:46 diaka

KUYANTIKA LESO: Kusala theatre ke songa bana ke sila bima mingi na munoko, na kati na yo bo ke sila mpi na kulanda Yesu. Kansi na nima, bo lungisa ve yina ya bo me sila.

MALONGI YA NENE: Yesu longaka kingana yai:

1. Na kati ya bana zole, mwana mosi buyaka kusala na bilanga ya tata, kansi na nima yandi balulaka mabanza, yandi salaka.

Tanga: *Matayo 21:28-29*

28 Yesu tubaka diaka nde: "Beno songa mono nki beno ke banza na mambu yai? Kuvandaka na muntu mosi vandaka na bana zole ya babakala. Yandi kwendaka kutubila mwana na yandi ya mbuta nde: "Nge mwana na mono, kwenda kusala na bilanga na vinu bubuyai."

29 Mwana vutulaka nde: 'Mono zola ve.' Kansi na nima, yandi balulaka mabanza na yandi, yandi kwendaka na bilanga.

Yula bana:

- Tata vandaka na bana ikwa?
- Yandi lombaka bo kusala inki?
- Mwana ya ntete vutulaka inki?
- Kansi na nima yandi salaka inki?

Kusala Théâtre: Tata binga bana zole. Yandi songa mwana mosi kukwenda kusala na bilanga. Mwana buya. Tata basika. Na nima, mwana yindula diaka, yandi balula mabanza na yandi, yandi kwenda kusala na bilanga.

Yimba: Mwana mosi buyaka, na nima balulaka, 'Buna yandi kwendaka kusala na bilanga.

2. Mwana ya zole silaka nde yandi ta sala, kansi yandi salaka ve.

Tanga: *Matayo 21:30*

30 Ebuna tata yina kwendaka kutubila mwana na yandi ya leki mutindu mosi. Mwana yina vutulaka nde: 'E, Tata, mono ta kwenda.', kansi yandi kwendaka ve.

Yula bana:

- Inki vandaka mvutu ya mwana ya zole?
- Keti yandi salaka yina ya yandi silaka?

www.teachingforafrica.com

Par l'ONG "Ministères pour Chaque Enfant"

Kusala Théâtre: Tata songa mwana ya zole kukwenda kusala na bilanga. Mwana ndima, tata basika. Na nima, mwana kwenda ve kusala yina ya yandi silaka.

Yimba: Mwana ya zole silaka, Mono ta kwenda! Kansi yandi salaka kima ve.

3. Yesu yulaka, na kati ya bana yai zole, nani salaka luzolo ya tata?

Tanga: *Matayo 21:31a*

31a Nani na kati na bo zole salaka mambu ya tata na bo zolaka?" Bo nde : « Mwana yina ya mbuta. »

Yula bana:

- Inki beno banza? Nani salaka luzolo ya tata--mwana ya kwendaka, to yina ya kwendaka ve?

Kusala Théâtre: Bana zole telema--yina ya salaka ti yina ya salaka ve. Bana ya nkaka songa nani salaka luzolo ya tata.

Yimba: Nani salaka luzolo ya tata? Mwana ya lemfukaka na yandi!

MALONGI YA NENE: Bantu mingi tuba nde bo ta landa Yesu, bo ta lemfuka na Yandi. Kansi yina ya beto tuba kele mfunu mingi ve, yina ya beto sala kele mfunu mingi.

MALONGI YA BAKRISTO: Sala théâtre ke songa mwana ya ke yindula kutuba luvunu to ve. Yandi banza yandi lenda basika na problème kana yandi tuba luvunu, kansi yandi bambuka nde yandi me sila kulanda Yesu. Yandi zenga kutuba mambu ya kieleka.

KUBINGA BANA NA YESU: Mbala ya nkaka nge me tuba bima mingi na munoko, kansi nge me zenga ntete ve na ntima na nge nde nge fweti landa Yesu. Nge me yamba Yandi ntete ve na ntima na nge. Ntangu ya mbote, yo yai. Bikala sika nge ikele na nima ya ecodim, ebuna mono ta kwisa kusadisa nge.

BANKUNGA YA KWENDA NZILA MOSI TI LESO:

MONO SILAKA KULANDA YESU—KUVUTUKA, YO LUNGA VE !

===

NSUKA YA BALESO YONSO